



Ukiuni 1960-ikkut qiteqqunneqarannit 1970-ikkut qiteqqunneqarannut qallunaat peqqinnissamik oqartussaasuisa Kalaallit Nunaanni naartunaveersaartitsinissamik periusersimasaat pillugu Qallunaat naalakkersuisuisa nassuiaateqarnissaannik suliamik aallaartitsinissamik qinnuigineqarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat, Naleraq)

(Siullermeerneqarnera)

Siullermik Demokraatiniik qujarusuppungut Partiip Naleqqap aaliangiiffinngisassatut siunersuummut taamak pingaaruteqartingisumut qaqitsinerannut.

Siullermik oqarusuppunga arlaannaataluunniit oqaluttuarisaanermi una pisimasoq akuersaarsinnaanngimmangu. Kalaallit arnat 1960-1970-sikkunni taamak pineqarsimanerat, naartunaveersaammik ikkussuiffingineqarsimanerat akuersaarneqarsinnaanngivissorpoq, periuseq atorineqarsimasoq amiilaarnarpoq. Oqaatsimmi eqqortut uani pisumi nalunarpulluunniit suut atussallungit.

Pingaarnertut demokraatiniik isumaqarpungut arnat pineqartut nukissamik tunineqarnissaat suliassaasoq, misingissutsimmi eqqartorneqarnerani puttallartut sularinissai imaannaasimassanngillat, tassuunalu tarpersersuissangutta inuit pineqartut kinaassusersineqarlutillu nanineqartariaqarput.

Aappaattut isumaqarpungut misissuineq iternga tikillungu ingerlanneqartariaqartoq, aaliangiisimaneq tunngavilersuutit, allarpassuillu qallorneqartariaqarmata.

Aammami inuit pisinnaatitaaffiit arlalinnut unioqqutitsineq ingerlasimasoq immikkut ilisimasallip qaqqippaa. Taamaammallu inissaminiippoq misissuineq ingerlanneqassasoq. Alloriaqqittoqarniassamat. Kissaatinginaqaarli misissuineq sivosoorujussuarmik ingerlanneqassanngittoq. Sivittorsarneqassanngittorlu.

Unalu oqaaseqarneq iluatsillungu arnanut pineqartunut ingammillu meerartaarsinnaajunnaanermik kinguneqartumik eqqungaasimasunut aammalu tarnikkut kingunerlutsitsisimasunut oqarusuppunga, nukiit piffissami aggersumi ilissinnut atorsingit, atorfissaqartitasi salliussingit, nammineq piomassuserinngisamik aqqusaangaqarsimanersi akuersaarneqarsinnaanngilaq, arnaqataasutullu politikikkut qalipaatilersungaanngittumik oqarusuppunga, naalangaaffiup pissusilersorsimanerata kinguneqartinneqarnissaa iluunngarluta ilungersuutingissuarput.

Arnap kinaassutsiminut sunniuteqartumik qulaaniik naalangaaffiit qulangiillutik inunnik ataasiakkaanik sussuseqanngitsunik tassami meerannguanik innarliisimaneq uanguulluni inatsisiliortuullunilu ilungersunarpoq aamma uummatikkut attortsisimanaqaaq. Qanorli eqqungaasut qaffakaasoqarnerini aamma oqimaattorsortingaasut. Tannalu nunaqqataasungut tamatta ataatsimoorfingalungu eqqungaasimasut tarpersorsornissaat tusarnaarnissaat nukissaqarfingineqarnissaallu pingaaruteqarpoq.

Naggataatingut oqarusuppunga qanortoq arnat 4500 missaaniittut qamuuna nukissamik tunineqarilik.



Taamatut oqaaseqarluta siunnersuut peqqissutsimut ilaqutariinnermullu ataatsimiitsitaliamut ingerlateqqinneqarnissaa innersuupparput, neriulluta piaartuumik sukumiisumillu suliarilluarneqarumaartoq.